



E reto di partidonan chikito:

RED, CURPA, HTC y esnan recien yega den eleccion 2024

ELECCION 2024 na Aruba ta priminti di bira un campo di bataya emocionante y competitivo, cu partidonan estableci y participantenan nobo competiando p'e favor di e votadonan. Mientras partidonan mas chikito manera RED, CURPA y HTC ta tratando di laga nan marca despues di un intento fayido anterior, esnan recien yega manera FUTURO, LpR, PDP, PPA y MIA ta enfrenta e reto di prueba nan mes den un panorama politico altamente fragmenta.

E regreso di RED, CURPA y HTC

Den eleccion 2021, RED, CURPA y HTC no a logra asiento, pero nan no a entrega. RED, dirigi pa Ricardo Croes, a logra genera atencion rond di e tema di cannabis medicinal na 2017. Sinembargo, no ta cla si e tema aki ta keda suficientemente poderoso pa atrae votadonan na 2024. Aunke RED t'e mas grandi di e tres partidonan aki, Croes mester arma un campaña renoba y vigoroso pa tin e chens di gana un asiento.

CURPA, lidera pa Eric Ras, ta basa riba un mensahe Cristian y etico. Aunke un gran parti di e poblacion di Aruba ta creyente, CURPA ta parece di tin dificultad pa liga votadonan religioso. Esaki ta pasobra hopi votado Cristian y Catolico hopi biaha ta spera cu otro partidonan politico lo adopta nan creencia. CURPA ta wordo confronta asina cu un paradox: a pesar di comparti e mesun balornan cu gran parti di e poblacion, ta parece dificil pa obtene apoyo politico basa solamente ariba e normanan aki.

HTC, cu a participa pa prome biaha na 2021, a posiciona su mes n'e momento ey como un partido di protesta contra e sistema politico estableci. Mientras cu e mensahe aki a resona entre e votadonan decepciona n'e momento ey, ta birando dificil pa HTC keda relevante sin un mensahe cla y renoba. E partido lo mester redefini su mes pa tin chens di haya algo di voto.

E contendiente mayor: PPA

Ademas di e partidonan aki, e Partido Patriotico Arubano (PPA) ta merece atencion special. PPA, dirigi pa Otmar Oduber, tin un historia largo den politica di Aruba y a hunga un rol importante den e prome añanan di e industria di turismo. Despues di un periodo di ausencia, PPA ta tratando

di gana un puesto atrobe na 2024. Cu Oduber na mando, tin hopi expectativa cu PPA por recupera su forza anterior.

Esnan recien yega n'e lucha electoral: FUTURO, LPR, PDP y MIA

E eleccion di 2024 tambe ta trece cuater partido nobo n'e campo di wega politico: FUTURO, LPR, PDP y MIA.

FUTURO, lidera pa Gerlien Croes, tin hopi expectativa rond di dje. Croes a ricibi mas cu 1.900 voto durante e eleccion anterior ora e tabata miembro di AVP. Awor cu e ta su so, e mester uza su experiencia pa convence e votadonan y reuni un partido fuerte tras di dje.

LpR, dirigi pa Rycond Santos do Nascimento, ta conoci pa su posicionnan habri. Su declaracionnan audaz a gana sigui-donan leal, pero su estilo controversial tambe por complica posibel colaboracion. Lo ta un reto pa LpR haya partnernan di coalicion y keda politicamente relevante.

PDP, funda door di Leonardo Figaroa despues di su salida di Accion 21, ta un partido cu principianan cla. Sinembargo, e posicionnan duro di Figaroa no lo hib'e automaticamente na victoria. E exito di PDP lo depende di su capacidad pa reuni un team fuerte y convence e votadonan di su vision.

MIA tin e reto mas dificil su dilanti. Aunke e partido ta comprometi cu e Historia Indigena di Aruba, lo ta dificil pa gana un asiento solamente cu e tema aki. MIA lo mester traha riba un mensahe mas amplio pa atrae un audiencia mas amplio.

Eleccion 2024 na Aruba ta priminti di bira un bataya entre partidonan estableci, actornan mas chikito y esnan recien yega pero ambicioso. Mientras RED, CURPA y HTC ta sigui lucha pa mantene nan relevancia politico, esnan recien yega manera FUTURO y PPA ta cla pa duna bataya. E partidonan nobo LpR, PDP y MIA tin hopi pa demostra, y nan exito lo depende di nan capacidad pa forma teamnan fuerte y transmiti mensahenan persuasivo na votadonan. Sin duda, e eleccion lo ta un reto emocionante pa tur partido involvi, y e panorama politico di Aruba por cambia drasticamente.